

Uunga siunnersuut: Raajanut akitsuutit pillugit Inatsisartut inatsisaata allanngortinneqarneranik Inatsisartut inatsisaat nr. x, xXx 2013-imeersoq

Aningaasaqarnermut Nunamullu Namminermut Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerseqarnissaanut saqqummiunneqartoq

Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Finn Karlsen, Siumut, siulittaasoq
Inatsisartunut ilaasortaq Gerhard Petersen, Atassut, siulittaasup tullia
Inatsisartunut ilaasortaq Evelyn Frederiksen, Siumut
Inatsisartunut ilaasortaq Jens Imanuelsen, Siumut
Inatsisartunut ilaasortaq Kalistat Lund, Inuit Ataqaatigiit
Inatsisartunut ilaasortaq Hans Aronsen, Inuit Ataqaatigiit
Inatsisartunut ilaasortaq Naaja Nathanielsen, Inuit Ataqaatigiit

UKA 2013-imi siullermeerinerup kingorna ataatsimiititaliap siunnersuut misissorpaa matumuunalu isumaliutini Inatsisartunit naliligassanngorlugit saqqummiullugit.

1. Siunnersuutip imarisai siunnertaalu

Inatsisissatut siunnersuut Inatsisartut inatsisaannut iluarsisutininik pingasunik imaqarpoq. Iluarsiissutit taakku "raajanut akitsuummik" akileeqqusisarnermi pisortat iluanaarutaasa annertusineqarnissaat siunertaraat. Raajanut akitsuutip naatsorsorneqartarnerani tunngavik inatsisissatut siunnersuutikkut appartinneqarpoq, taamaalilluni akitsuut akiligassaq kiilumut ataatsimut 11,70 kr.-init kiilumut ataatsimut 9,60 kr.-inut appartinneqarluni. Allanguut tamanna Nunatta Karsiata 16 mio. kr.-inik iluanaaruteqarneruneranik nassataqassasoq Naalakkersuisunit naatsorsuutigineqarpoq.

2. Siunnersuutip Inatsisartunit suliarineqarnera

Siunnersuut siullermeerneqarmat siunnersuummi siunertarineqartut piviusunngortinneqar-nissaat ataatsimut isigalugu taparserneqarpoq. Naak inatsisissatut siunnersuutip avataasiorluni aalisarnermut siunissami aningaasaqarnikkut kingunerisinnaasai eqqarsaatigalugit partii ataaseq tunngaviumik eqqarsarnartoqartitsigaluartoq.

3. Tusarniaarnermit akissutit

Kattuffiit makku tusarniarneqarput: KANUKOKA, Kalaallit Nunaanni Sulisitsisut Peqatigiif-
fiat (GA), Nunaqavissut Suliffiutillit Kattuffiat (NUSUKA), Sulinermik Inuusutissarsiate-
qartut Kattuffiat (SIK), KPMG Grønland, Deloitte, Grønlands Revisionskontor, Inuusutissars-
siornermut, Aatsitassarsiornermut Suliffeqarnermullu Naalakkersuisoqarfik, Aalisarnermut,
Piniarnermut Nunalerinermullu Naalakkersuisoqarfik aammalu Ineqarnermut, Pinngortitamut
Avatangiisinullu Naalakkersuisoqarfik.

Piffissap tusarniaaffiusup naanerani Ineqarnermut, Pinngortitamut Avatangiisinullu Naalak-
kersuisoqarfimmit, SIK-mit, Kalaallit Nunaanni Sulisitsisut Peqatigiiffiannit (GA) aammalu
Aalisarnermut, Piniarnermut Nunalerinermullu Naalakkersuisoqarfimmit tusarniaanermut
akissutit tiguneqarput. Ataatsimiititaliaq tusarniaanerup ingerlanneqarneranut oqaaseqaa-
tissaqanngilaq.

4. Ataatsimiititaliap siunnersuummik suliarinninnera

Kalaallit Nunaanni pinngortitap pisuussutai, tassunga ilanngullugit raajat inuiaqatigiinnit
pigineqartut ataatsimiititaliaq isumaqarpoq. Tamanna avataasiorluni raajarniarnermut aamma
atuuppoq. Inuiaqatigiit raajartassanit iluanaarutinit annertunerusumik pissarsisinneqartar-
nissaasa qulakkeerneqarnissaa inuiaqatigiit tungaannit nalinginnaasumik isigalugu naaper-
tuuttuusoq ataatsimiititaliaq isumaqarpoq. Pisuussutitut akileraarutip atuunera inuiaqa-
tigiinnut naleqquttumik agguataarinissaq pillugu apeqqummik soorunami pilersitsivoq. Taa-
maattumik raajanut akitsuutip inuusutissarsiummik ingerlataqartunut akornutaanngitsumik
ilusilersorneqarlunilu atuutsinneqarnissaa ataatsimiititaliap isumaa malillugu pingaarute-
qarpoq.

Akitsuummik qaffaaneq Naalakkersuisunit ima tunngavilersorneqartoq ataatsimiititaliamit
maluginiarneqarpoq:

*”Raajarniutit tunisassiorfiutigisut naatsorsuutaat kingullit tunngavigalugit
naatsorsuinerit takutippaat ukiuni kingullerni sinneqartoortaaarsimasut 22,3
procentimik iluanaaruteqartitsisimallutik – aalisakkanit pisuussutit nalingisa
ukiuni kingullerni qaffasissuusimanerat tamatuma takutippaa.”*

Aningaasaliissutigineqartunit iluanaarutit aammalu piginnittup nalinginnaasumik iluanaarutai

ilanngullugit aningaasartuutit tamarmik akilerneqareerneranni raajarniutaatillit nalinginnaasumit qaffasinnerungaartumik iluanaaruteqartartut ataatsimiititaliaq isumaqarpoq. Aningaasaliissutigineqartartut nalinginnaasumik iluanaarutigineqartarnerannit annertunerusumik isertitaqartoqartartoq ataatsimiititaliaq isumaqarpoq.

Tamatuma peqatigisaanik Naalakkersuisut ima oqarnerat ataatsimiititaliamit tusaatissatut tiguneqarpoq:

Akitsuut raajarniutit tunisassiorfiutigisut imminut akilersinnaasumik ingerlanerannik misissueqqissaarnermik tunngaveqarpoq, misissuinerullu takutippaa raajarniarneq ajornartorsiorfiusutut ilimanaateqanngitsoq. Umassusilerisut siunnersuutaat tunngavigalugit naatsorsuutigineqarpoq ukiuni aggersuni pisassiissutissat allannguuteqangaarnaviannigisut, tamannalu tunngavigalugu ilimagineqarsinnaavoq tunisiner-mi akit maanna qaffasingaatsiartut allanngutsaaliorneqarsinnaassasut.

Kvartalini sisamani kingullerni raajanut akitsuusigassaataasunut kiilumut ataatsimut agguaqatigiissillugu akiusoq aallaavigalugu naleqqersuutip naatsorsorneqartup atorneratigut raajanut akitsuutip ilusilersorneqarnerani nunarsuarmi niuerfinni akigitat nikerarsinnaanerat ilanngullugu eqqarsaatigineqarsimavoq. Akit appariartorpata akitsuut appassaaq. Akit qaffaneranni akitsuutit qaffassapput. Taamaattumik aalisarneq inuussutissarsiutilluunniit naammassisaqarsinnaassusia akitsuummit sunnerneqassasut ataatsimiititaliamit ilimagineqanngilaq. Paasissutissat akerlianik tikkuussisut ataatsimiititaliamit ilisimaneqanngillat. Tunngavissat pigineqartut tunngavigalugit ataatsimiititaliaq isumaqarpoq uppernarsisinneqanngitsoq avataasiorluni raajarniarnermi aningaasaqarnikkut ima inissisimasoqartoq akitsuutit qaffanneqarsinnaanatik.

5. Siunnersuutip aningaasaqarnikkut kingunerisassai

Siunnersuutip piviusunnigortinneqarnerani aningaasaqarnikkut kingunerisassat siunnersuummut nalinginnaasumik nassuiaatini nassuiaatigineqarput. Naalakkersuisut nassuiaatini nalilinerannit allaanerusumik naliliinissamat ataatsimiititaliaq tunngavissaqanngilaq. Taamaalillunilu Naalakkersuisut apeqqummik tamatuminnga sukumiisumik misissuisimassasut aammalu inatsisissatut siunnersuutip akuersissutigineqarnerani umiarsuaatileqatigiit inatsisip kingunerisaanik siumullu naatsorsuutigineqanngitsunik aningaasaqarnikkut sunniivigineqassanngitsut ataatsimiititaliamit tatigineqarpoq.

6. Ataatsimiititaliap inassuteqaatai

Ataatsimiititaliami amerlanerussuteqartut Siumut Atassullu siunnersuut pillugu ima oqaaseqaateqarumapput:

Siunnersuutip aappassaaneerqarnissaanut paasissutissat annertunerusut pisariaqartinneqartut amerlanerussuteqartunit isigineqanngillat.

Tamanna tunngavigalugu siunnersuut Inatsisartunit akuersissutigineqassasoq ataatsimiititaliami amerlanerussuteqartut siuliani allassimasut inassutigaat.

Ataatsimiititaliami ikinnerussuteqartut Inuit Ataqtigiit siunnersuut pillugu ima oqaaseqaateqarumapput:

Siunnersuut piffissap imaalinerani Inuit Ataqtigiinnit akuerineqarsinnaananilu itigartinneqarsinnaanngilaq. Siunnersuut pillugu paasissutissanik erseqqinnerusunik pissarsiniarnissamik ikinnerussuteqartunit kissaatigineqartup ataatsimiititaliami amerlanerussuteqartunit itigartinneqarnera Inuit Ataqtigiinnit ajuusaarutigineqarpoq. Naatsorsuinermi tunngavik aammalu akitsuutip qaffasissusissaanik aalajangiinermut atatillugu isumaliutit pillugit annertunerusumik paasissutissinneqarnissaq Inuit Ataqtigiit kissaatigaat Naalakkersuisunullu kaammattuutigalugu pingajussaaneerinissaq sioqqullugu paasissutissat taakku Aningaasaqarnermut Ataatsimiititaliamut nassiunneqarnissaat namminneerlutik sulissutigeqqullugu. Inatsisartuni ataatsimiititaliat tamarmiusut ilisimasanik aallaaveqartumik sulinissamut aammalu ilaasortat ilisimasanik pissarsinissamut pisariaqartitsinerannik malinninnissamut pisussaasut Inuit Ataqtigiit isumaqarput.

Tamanna tunngavigalugu ataatsimiititaliami ikinnerussuteqartut siuliani taaneqartut piffissap imaalinerani siunnersuut Inatsisartunit itigartinneqartussatut akuerineqartussatulluunniit inassutigisinnaanngilaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Finn Karlsen, siulittaasoq

Gerhardt Petersen

Evelyn Frederiksen

Jens Immanuelson

Naaja Nathanielsen

Hans Aronsen

Kalistat Lund